

# Muhyiddin boleh ke London tapi tidak boleh transit lama di Dubai

**KUALA LUMPUR:** Mahkamah Tinggi di sini, semalam membenarkan permohonan bekas Perdana Menteri, Tan Sri Muhyiddin Yassin untuk mendapatkan pasportnya bagi menjalani pemeriksaan kesihatan tahunan di London.

Bagaimanapun, Hakim Noor Ruwena Noordin menolak permohonan Muhyiddin untuk transit selama enam hari di Dubai dengan alasan tiada keperluan munasabah berhenti di negara itu dalam tempoh lama.

"Berdasarkan afidavit sokongan, saya tidak melihat sebarang justifikasi untuk (Muhyiddin) transit selama lima hingga enam hari di Dubai. Bahagian ini sangat ketara, sedangkan transit boleh dilakukan satu atau dua hari sahaja," kata Hakim Noor Ruwena.

Hakim kemudiannya menegur tindakan Muhyiddin yang membuat tempahan penerbangan terlebih dahulu tanpa mendapatkan kebenaran mahkamah dan memintanya memendekkan tempoh transit di Dubai.

"Sebenarnya saya tidak cenderung untuk meluluskan permohonan ini. Kamu tidak boleh mengambil mudah terhadap setiap permohonan yang dibenarkan mahkamah. Kamu perlu mendapatkan kebenaran sebelum membuat tempahan tiket," katanya.



**MUHYIDDIN** Yassin hadir ke Mahkamah Tinggi, Kuala Lumpur semalam untuk permohonan pasport. - UTUSAN/M. FIRDAUS M. JOHARI

Menurut afidavit, Muhyiddin dijadualkan berlepas dari Kuala Lumpur ke London pada 15 Disember bagi menghadiri janji temu perubatan di Platinum Medical Centre pada 17 Disember sebagai sebahagian pemeriksaan berkala terhadap penyakit kanser *pankreas* yang dihidapinya.

Beliau turut merancang meluangkan masa bersama keluarga termasuk cucu-cucunya di Madrid dari 20 Disember 2025 hingga 2 Januari 2026 sebelum pulang ke Kuala Lumpur.

Transit selama enam hari di Dubai merupakan sebahagian daripada jadual perjalanan itu.

Mahkamah menggunakan budi bicara membenarkan permohonan pelepasan pasport dengan syarat dokumen itu dipulangkan pada atau sebelum 5 Januari 2026.

Sebelum ini, mahkamah turut membenarkan beberapa permohonan Muhyiddin mendapatkan pasport secara sementara bagi tujuan keluarga dan perubatan, termasuk menghadiri majlis graduasi cucunya, sesi konsultasi berkaitan kanser *pankreas* di London, pemeriksaan perubatan di Singapura serta menghadiri majlis pembukaan restoran milik rakannya di Thailand.